



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8


Yangia anidakangma :

f Tir Yimyim

ig tir_yimyim

yt tir yimyim

TAPAK 7



Arjun Tendulkar T20 Mumbai League auction pool nung züngokogo

Trump-i nuclear deal atema ano Iran amokmerener



VOL. XXIII ISSUE NO. 196 (ADOK 196) DIMAPUR YANGTEPNÜ THURSDAY) RONGCHII (APRIL) 30, 2026

₹ 5.00

DMC mapa inyakertemi lungkak aittsü

Dimapur, April 29, 2026 TYO): Dimapur Municipal Council (DMC) nung mapa inyakertemi May 5, 2026 nungi 'no pay, no work' tenzüksü metetdaksüogo.

Parnok nem mapang talangka itasen aser sen tagütsüsü magütsür ta shia lungkak aittsü metetdaksü.

Bodbarñü sanen luden züngsem ka amendang iba lemtet agiogo ta Dimapur Municipal Council

Employees' Welfare Union (DMCEWU)-i sangdong ka nung ashi.

DMCEWU-i May 5 nungi DMC kübok sanitation aser public services ajunga anentsü ta metetdaksüogo.

DMCEWU-isa December 2025 nung parnok nem senotsü shitak magütsüba atema cease-work tenzuka liasü saka Dimapur Municipal Council-i agütsüsü ta nangzükba agi lungkak aitba anena liasü.

Kohima nung auyaba motorcycle Peren nung angu

Dimapur, April 29, 2026 (TYO): Andhra Pradesh nungi YouTuber ka indang Royal Enfield Himalayan 450 motorcycle Kohima nung auyaba sülen Kohima Police-i ngutetogo.

Kohima Police-i anogo ter tsüingda motorcycle bushitetogo aser iba dak sendakba nung nisung ana pua lir ta PRO, Kohima Police-i sangdong ka nung ashi.

April 17, 2026 nü Andhra Pradesh nungi biker aser YouTuber Katabathina Sudheer Kumar-i North Police Station, Kohima nung pa indang motorcycle samaba FIR ka benoka liasü.

Midlane Colony, Kohima nung homestay ka nungi pa indang motorcycle auyaa bener ao ta Katabathina-i FIR nung shia liasü.

Iba ken o benokba sülen

North Police Station-i bushisüingda ka tenzuka liasü aser Peren district kübok New Jalukie area len motorcycle tsüingsü bushiteta liasü.

Iba sülen April 27, 2026 nü Kohima Police-i Peren Police den yaritepa motorcycle ngutetogo. Iba dak sendakba nung police-i Ilungchube ta ser tongti süa tai tongloksüasang aser motorcycle alizüker Amos Pame na apu.

Iba dak sendakba nung maneni bushisüingda südar aser auyaba motorcycle ngutetba ajanga Kohima Police o Peren Police tsüingda tesentaktep tajung aliba sayur.

Kohima Police-i tourists aser sensotem kümzüka ayutsü tenangzükba aliba metetdaksüogo aser state tenung menüksüba maparen magizüksü ta ashi.

Nagaland tesem balala nung NEPEX atema Table Top Exercise agi

Dimapur, Rongchii/April 29 (TYO): Nagaland Emergency Preparedness Exercise (NEPEX) 2026 indang shilem ka ama State tesem balala nung April 29, 2026 nü Table Top Exercise ayongzuka liasü.

KOHIMA: NEPEX 2026 nung shilem ka ama Nagaland State Disaster Management Authority (NSDMA) ajanga State Emergency Operation Centre, Capital Convention Centre, Kohima nung April 29, 2026 nü Table Top Exercise ka ayongzuka liasü.

Iba sentong nung jembidang, 8 buba NEPEX nükjidong ya stakeholders renema aliba asadangtsü aser standard operating procedures (SOPs) tendanga jangjateptsü asoshi lir, ta Chief Secretary & Chairman, State Executive Committee, Sentiyaner Imchen, IAS-i ashi.

Ajidang masü lendong timtem mapang tali tajungba aser telungjemba nung telangzüba agütsüsü asoshi department balala tsüingta amalitem nung tashi itshitsü asoshi lir ta pai ashi.

Iba exercise ajanga tongtipang inyakyim asadangtsü, metokmeperi jangjatsü aser



Sentiyaner Imchen, IAS

nüburtem tali tajungba nung renemshia awareness tajungba agütsüsü, ta pai metetdaksü.

April 30, 2026 nü NEPEX ayongzüksü aliba indang jembidang, menoknok magnitude 7.7 anoker ama iba maparen ya inyaksü, kong ki o jen aika raksaba, communication networks nung timtem ajuruba aser healthcare system tashi dak alia timtemer aliba den ano alinen aser kitsük-kirong lendong ajuruba ama iba mapa ya

inyaksü, ta Imchen-i metetdaksü.

Iba exercise nung district administrations, security forces, paramilitary units, healthcare providers, urban local bodies, village councils, NGOs aser arogo balalai shilem agitsü, ta ashi.

Chief Secretary-i department ajunga aser district balala dang temulung agüja iba sentong ayongzuka agitsü ajungshia liasü.

Lead Consultant (ME & IRS), National Disaster Management Authority (NDMA) Maj. Gen. Bahl-i iba sentong nung jembidang, iba exercise ya district shia tesem pongu mesüra trok nung alitsü ta ashi.

Home Commissioner Abhijit Sinha, IAS-ia lendong timtem ajuruba mapang renema alitsü aser teka amteper telangzüba agütsüsü tongtipang lir ta ashi.

Technical session mapang Dr. Johnny Kadunsin

Ruangmei, Joint Chief Executive Officer, NSDMA ajanga Disaster Management Plant indang presentation agütsü aser Maj. Gen. Sudhir Bahl-i anir Table Top Exercise agia liasü.

(Maneni tapak 2 nung...)

Ungma O Tuophema Yimna Tsüingta Ak Süteper Küm 25 Ajunger



Abelen nungi – Nüngsang Jamir Tatar, Sütsüngkaba Longkumer Tatar, Tiajungba Tatar aser C. Rongsen Pongener noksa nung angur. Ungma, 29th April, 2026

Ungma yim, 29th April, 2026 (TYO): Ungma aser Tuophema yim na ak süteper taküm küm 25 ajungba nüngtem nung "Rüna Khrietho – Maong Aksü" ta sür sentong tulu ka yangi Ungma yimdak 2nd May, 2026 nü ayongzuka lir.

Iba sentong ya "Kaam Zemshi" omen dak rangloker talisa yimna tsüingta temba yimtepba aser telungjem tali akangtsü asoshi ayonger, ta Ungma Village Council Chairman & Planning Committee Convenor, Sütsüngkaba Longkumer Tatar-i osangbener senden ka Ungma Rural Assembly Hall nung akadang metetdaksü. Ibai yimna tsüingta

asoshi dang masü saka Naga kin songjen telungjem dak rangloker ayongba sentong ka lir, ta pai ashi.

Iba aksü sentong ya taoba 2001 küm Dr. S.C Jamir Nagaland Chief Minister asüandang Touphema yimdak Sekrenyi benjong amungba mapang ka tenzük, idangji tang teinyakdak Nagaland Chief Minister Dr. Neiphu Rio ya Home Minister inyaka liasü, ta paisa ashi. Iba sülen 2012 nung Tuophema yimi Ungma semdang aser 2022 küm Ungma-i Tuophema yim semdang, aser tang ya Tuophema pur Ungma yimdaki arur, ta paisa metetdaksü.

Aor sobaliba nung aksü tapu

balala lir, item rongnung "Maong Aksü" ya-a balaka lir. Idang ya yim kadi yim ka nem temba yimtepba tamaitüsü ak ka tiyongi zükmar tesadang kasa senpettsür. Yamaji ano yim kadi yim ka semdangdang tangar yim jagia kasaji inyaker. Maong Aksü ya yim densema lenir tsüingta süteper, ta Tiajungba Tatar-i ashi.

Ibai jurila ajangzüksü atema inyakba maparen ka masü saka yimna tsüingta aser Naga nunger songjen yimjung apu alatsü nükjidong yur tenzükba lir. Kechiyong iba maparen tenzükba mapang Naga lima tang amai tensa tia süngjema malitsü, ta paisa shisem.

(Maneni tapak 2 nung...)

Assam elections nung NDA-i menden teimba angutsü: Exit polls

Guwahati, April 29, 2026 (Agencies): Assam Assembly elections atema exit polls aikati Bharatiya Janata Party (BJP)-i aniba National Democratic Alliance (NDA) ajanga takok tajung angutsü asadangtetba metetdaksüogo.

Iba osang ajanga Chief Minister Himanta Biswa Sarma-i ano kümsük ka atema tashi angutsü sayur.

Züngsem 126 agi akümba Assembly nung NDA-i menden aika nung takok angutsü ta exit polls ajanga ashir.

Axis My India exit poll ajanga Assam Assembly elections nung BJP-i aniba NDA ajanga menden 88 aser 100 tsüingda angutsü ta ashir.

Parnokisa Congress-i menden 24 nungi 36 tashi angutsü aser vote share nung NDA-i 48% aser Congress-i 38% angutsü imlaba metetdaksüogo.

Külen, Matrize exit poll-ia BJP

ajanga menden 85 nungi 95 tashi angutsü asadangtetba metetdaksüogo.

Parnokisa Congress ajanga menden 25 nungi 32 aser tanga party tem o independents ajanga menden 6 nungi 12 angutsü ta ashir.

Peoples Pulse Research Organization ajanga exit poll osang metetdaksüba nung BJP-i menden 68 aser 72 tsüingda aser Congress-i menden 22 aser 26 tsüingda angutsü ta ashir.

Ajisüaka exit polls ya post-voting surveys nung amendaker asadanger aser final results tejangjabo meshitet. Iba maparen inyakdang sampling, voter response patterns aser methodology ajanga asadanga nung meputep adoktsü akok.

Anungji, Assam Assembly elections 2026 indang official results tejangjabo May 4, 2026 nung ang metettsü.

Dimapur nung State level leadership workshop for PwDs ayongzük



Dimapur, Rongchii/April 29 (TYO): Dimapur nung aliba Hotel Saramati nung April 28, 2026 nü "Empowered Voices, Ability in Action, Shaping Tomorrow's Leaders" omen kübok State level leadership workshop for PwDs ayongzükba liasü.

Iba sentong ya session asem lemsar agi. Mezüing session nung 'Capacity building and awareness' onük nung ajemdaker Yangerjungla, Coordinator cum Trainer, LIC HFL Sarthak, Prodigals' Home aser K. Sani, Project Director, Prodigals' Home nati NGOs inyakyim balala indang jembia liasü. Akihoto K, State Coordinator, UDID project ajanga Social Welfare

Department-i PwDs atema scheme balala agütsüba indang rasaa ashi.

Tanabuba session nung Theodore Yanthan, Joint secretary, Social welfare Department & Secretary SCPD ajanga pela agizükba o jembi, Limawabang Jamir, IAS Secretary, Social Welfare Dept. and State Commissioner for Persons with Disabilities ajanga iba sentong ayongzükba nükjidong rateta ashi.

Limawabang-i ashiba agi, lemtamatar akumtsüboa aser anepalua amshitsü ayongzük aser sorkari scheme balala agüja aliba asangsang nung mapa kuma inyaksü ayongzük.

Paisa senotsü teyari tali

agütsütsü atema Department of Social Welfare-i lenmang bushitar ta ashi.

Iba sülen Kiyevi I Swu, Dy. Director, Directorate of Food and Civil Supplies aser Nungshilemba, Dy. General Manager, NST nati par departments nung PwDs atema scheme balala agütsüba indang sentong nung adener nem angazükdakja liasü.

Tasembuba aser tatemsaba session nungya shilem agir lemtamatar tem tsüingta sensaksemba mapang ka taoba Disability Commissioner, Diethono Nakhro-i anir agia liasü.

Iba workshop nung district 17 nungo PwDs parnok 52 dena liasü.

Dimapur nung mejangjaba tasü mang ka nguteta lir

Dimapur, Rongchii/April 29 (TYO): Mejangjaba nisung (tebur, non-Naga) tasü mang ka Railway Bazar, Dimapur anasa siding area nung nguteta lir, ta Station Manager NF Railway Dimapur nungi April 29, 2026 nikongdang 4:30 ako meta tezüluba osang ka Dimapur Police dangi arua liasü.

Iba osang aguba sülen duty nung alirtem iba tesem tonga ao aser yangji arishi küm 50 nungi 55 tsüingta tain tebur tasü mang ka liasü. Iba tasü mang mita reprang aser nisungba ya shiranga asü südi ta parnok

ajitet, ta Dimapur Police sangdong ka ajanga ashi.

Ozüing agi melaba maparen ajak tembangba sülen tasü mang ya PM examination/identification atema District Hospital Dimapur Morgue nung bener oa lir.

Nisungba ya tula sentüsü temesüing aser half pant sentüsü tanen semer liasü.

Kibur/kinunger/tembar temi Officer-in-Charge, Govt. Railway Police Station (GRPS), Dimapur den Mobile No. 7085055021 ajanga tongteprateptsü ayongzükba, ta sangdong ajangasa ashi.

Nagaland tesem balala...

(TAPAK 1 NUNGI...)

DIMAPUR: Dimapur nung NEPEX 2026 atema renemshia Table Top Exercise ya Deputy Commissioner, Dimapur indang Conference Hall, Purana Bazar, Dimapur nung agia liasü.

Iba sentong ya District Disaster Management Authority (DDMA), Dimapur ajanga ayongzük, kong observers, site in-charges aser volunteers ama shima aliba ketdangsürtem aden.

Dimapur nung iba mock drill ya DC Office (Staging Area), Government Higher Secondary School, Purana Bazar; Hollotoli School, Naharbari; Westside Store, Darogapathar; Indian Oil (IOCL), Kevijau; aser PHC Purana Bazar nung alitsü.

PEREN: Peren nung NEPEX 2026 atema Table Top Exercise ya Bodhbarnü Deputy Commissioner, Peren indang Conference Hall nung ayongzükba liasü.

Iba sentong nung Deputy Commissioner & Chairman, DDMA Peren, Hiazu Meru-i NEPEX aser Incident Response System (IRS) indang rateta ashi aser department balala tsüingta teka amteper mapang shidak nung telangzüba agütsütsü indang jembia liasü.

Brehostibarnü Peren district kübok NEPEX sentong ya Peren Town aser Jalukie Town nung agitsü aser Piphema nung tiyong sür menoknok 7.7 magnitude anokba ama iba sentong ayongzüktsü ta ashi.

Iba sentong nung SDO (Civil), Peren, Sentilong Ozukum-i mock drill yimya indang lemsatop aser District Commandant, Home Guards & Civil Defence, Peren, Vingutuo Angami-i "Air Raid" simulation indang sayua liasü.

ZUNHEBOTO: Home

Department kübok NSDMA ajanga ayongzükba State Emergency

Operation Centre, Capital Convention Centre, Kohima nung Bodhbarnü Table Top Exercise nung Deputy Commissioner, Zunheboto, Dharam Raj, IAS den Head of Offices, Zunheboto tem virtual yimya nung aden.

NOKLAK: State tesem ajanga nung NEPEX statewide mega mock drill atema Table Top Exercise sentong ka NSDMA kübok DDMA, Noklak ajanga Superintendent of Police, Noklak indang Conference Hall nung April 29, 2026 nü ayongzükba liasü.

Iba sentong nung DC & Chairman, DDMA Noklak, P. Mono Khamniungan ajanga NEPEX aser IRS indang rateta ashi.

ADC & CEO, DDMA Noklak, Relise Sangtam ajanga tayongzükba o jembi aser DPA, DDMA Noklak, Tanghiu ajanga NEPEX sentong tongmelang agi rasaa liasü.

Maneni OC Noklak (Wireless), Sulem-i wireless communication sets amshiba yimya sayua liasü.

LONGLENG: NEPEX 2026 atema terenemshiba sentong Table Top Exercise ya Longleng nunga DPDB Hall nung Deputy Commissioner & Chairma, DDMA Longleng, W. Manpai Phom, NCS lenisüba kübok agia liasü.

Noklak nung iba exercise ya tesem pezü nung agitsü jangjatetogo. Iba drill nung stakeholders, sendaktepa aliba department aser nüburtem amalitep akatsü DC ajanga ayongzük.

Additional SP Longleng, Hiatwa Iralu NPS ajanga sentong nung IRS indang jembia liasü.

Asetkong nung Ak mesüa tajangzük agitsü mapatong tenzük



Asetkong nung ak metsühtsüpurtem den külemi MLA & Advisor for Law & Justice, Land Revenue Wb.T.N.Mannen ,IAS(Retd) aser sentong nung shilem agirtem külemi tangokba noksa nungji angur.

Mokokchung, Rongchii/ April 29(TYO) : 23 Impur Assembly Constituency kübok aliba nüburtem nem Hon'ble MLA & Advisor for Law & Justice, Land Revenue Wb.T.N.Mannen ,IAS(Retd)-i District Plan nungi sen Lakh 25 agi ak alia tangalen nungi bener arua teyari agütsüogo.

Tanü iba sentong ya Senden Salang Kubolong nung Asetkong tsükong nung alir nüburtem ak metsütsü ataa alirtem aser yim shia nung putu yimsüsurtem adenshia kaogo.

Sentong nung MLA & Advisor Wb.T.N.Mannen-i jembidang Naga lima nun gak achibaji asadangra noklang nung 40 shilem dang Naga nungeri metsühba aser aser tanüingba 60 shilemjibo tangalen nungi bener arur, anungji ak metsüba nung temelung agütsüra yangji tajangzük aika lir, küm tepeyong tekong lu ayimba nungi ajangzükba dang nungibo ak metsüba nung tajangzük timba lirta ashi.

Asetkong nung ak metsühba ajanga rongsenketsüing

ajungketa nübur anisüingzükba alitsü asoshi iba mapa ya tenzükba, anungji iba mapatong takok nguteta tajangzük agitettsü asoshi ak metsürtemi ak anepalua metsühba den yim shia Village Council-ia ak metsürtem ajungshitsü nungtakar ta MLA & Advisor Wb.T.N.Mannen-isa ayongzükba jembi.

Asetkong nung aka metsühtsütsü asoshi tzi mupong kanga dang tajung aser ak achitsü asoshi alishi,menti aser süngolio aika lir, anungji iba maongka tajung ya agia meranga inyakang. Ak ya asen lima tzi mupong den puteptsüsa jung junga asadanger West Bengal nungi bener aruba lir, ano tesülen inyaka aoba mapang nung insurance yanglutsü maparen inyakyonga aotsü, anungji kanga dang merang anepalu nentaka inyakangta Wb.T.N.Mannen-isa ak metsühtsü asoshi shimteta alirtem ajungshia jembi.

Asetkong nung ak metsühtsü asoshi ak ajak agi 169 liasü aser itemji kibong 105 nem lemsa-a agütsü. Kasa sentong

nung Asetkong Mungdang Tir Wb.Imlitoshi ajanga tarur pela agizükba den tayongzükba o jembi, MCT Council Chairman Wb.Akumjungba ajanga tajungshi o jembi aser Farm Manager, State Cattle Breeding Farm nungi Dr.N. Yanger Kubzar-ia ak metsüba nung nungtakba mapatongtem aser teyari ngutettsü lenmang balala aliba lemsatopa liasü aser ano Think Tank telok nungi Wb.Aongsen ajanga tepela o den ano nungtak teinyaktsütem lemsatopa liasü.

Asetkong nung tang iba ak metsühba mapatong tenzükba ta Asetkong lima ajungkettsü asoshi tentetba Think Tank telok achayaanga inyaker aser iba mapatong nungya ak metsürtem ak wara agi atongba mapang nung par teloki veterinary doctor-tem den külemi anepalutsü renema lir.

Mezüingbuba sentong temer kelen ano tanabuba sentong nung Dr.Simon Ao aser Dr.Sarendi Walling tena ajanga Ak koda metsühtsütsü item tasa balala sayuba mapang agia liasü.

Ungma O Tuophema Yimna... (TAPAK 1 NUNGI...)

25th February, 2001 nung Sekrenyi amungdang Dr. S.C Jamir-i anir Ungma-i mezüing Tuophema yim semdang, aji sür, Dr. Neiphu Rio-i anir Tuophema yimeri 3rd May, 2012 nü Ungma semdang. Ungmai tanaben Tuophema semdangbaji 2022 nung liasü aser tangji Tuophemai 2nd May, 2026 nü Ungma semdang.

Iba mapang yimna sanger atema dang masü saka Naga nung songjen dak rangloker bangzüing karbo renemtsü imlar, ta tayongertemisa metetdaksü.

Rüna Khrietho - Maong Aksü sentongji anepdang 10:00 ako nungi tenzükba Yimtsüingda Arok Arok Sabang, Ungma nung akatsü. Iba sentong nung Nagaland CM, Dr. Neiphu Rio; taoba Nagaland CM, taoba

Maharashtra, Gujarat, Goa, Odisha Governor & Padma Bhushan, Dr. SC Jamir; aser NLA Speaker, Sharingain Longkumer parnok tongti shilem agitsü. Iba den ano tongtibang nisung balalai shilem agitsü sentong renema lir.

Iba den külemi 1st May, 2026 nüji Tuophema Kaketshir Telongjem o Soyim Shisaluyimer Telongjem na "synergy in cultural heterogeneity" omen dak rangloker loktiliba & sobaliba angazüktep sentong ka Naro Tokong, Ungma nung akatsü renema lir.

Ungma Kosasanger Pusu Menden-i iba otsütsütsü aketba sentong nung Naga nung aser temulunger ajak pela shishia jaoker, ta Ungma yimsüsurtemisa ayimoktsü.

Bengal election tanabuba shilem nung voters shilem 90-i vote agütsü



April 29, 2026 nü Kolkata nung aliba polling station ka nung vote agütsütsü atema nisung aika tarensena nokdaka aliba noksa nung angur. West Bengal nung Assembly elections tanabuba shilem tembangogo.

New Delhi, April 29 (Agencies): Bodhbarnü West Bengal assembly elections tanabuba shilem nung nikongdang 5:00 ako tashi nung voters shilem 89.99-i vote agütsü, ta Election Commission of India-i metetdaksü.

Purba Bardhaman nung voters teimbai (92.46%) vote agütsü, iba sülen Hooghly

(90.34%), Nadia (90.28%), Howrah (89.44%) aser South 24 Parganas (89.7%) liasü.

April 23 nü Bengal nung election mezüngbuba shilem nung voters shilem 91.78-i vote agüja liasü. Mezüngbuba shilem nung Trinamool Congress-i menden 100 nungbosa takok angütsü ta ashi aser BJP-ia parnoki menden 110 nung takok

angütsü, ta jembia liasü.

West Bengal nung election mezüngbuba shilemji menden 152 atema agi aser tang tanabuba shilem ya menden 142 atema agiogo.

Election tanabuba shilem nung vote agütsütsü temsüa alir voters crore 2.22 (tebur 1,64,35,627 aser tetsür 1,57,37,418) liasü.

BJP-i WB/Assam na nung aser DMK-i TN nung takok angütsü: Exit polls

New Delhi, Rongchii/April 29 (Agencies): West Bengal, Tamil Nadu, Assam aser Kerala nung assembly elections agiba sülen exit polls osang Bodhbar aonung sangdongogo.

Exit polls balala ajanga, BJP-i West Bengal aser Assam na nung takok angütsü, DMK-i Tamil Nadu nung takok angütsü aser UDF-i Kerala nung takok angütsü ta asadangteter.

Bodhbar nikongdang West Bengal nung assembly elections tanabuba shilem tembangba sülen mapang tatsüka tsüingda exit polls osang sangdong.

West Bengal nung Trinamool Congress aser BJP na kanga atongtepa toktep,

Tamil Nadu nung DMK aser AIADMK na atongtepa toktep aser Kerala nungbo party aika tsüingda toktep.

Exit polls balala ajanga Tamil Nadu nung chief minister MK Stalin-i aniba DMK-i takok angütsü, ta metetdaksü.

West Bengal nung Matrise news projects exit Poll ajanga, BJP-i menden 146-161 angütsü aser TMC-i menden 130-140 angütsü ta metetdaksü.

Ajisüaka People's Pulse poll ajangabo Bengal nung TMC-i takok angütsü ta asadangtet. People's Pulse-i, TMC-i menden 177-187, BJP-i menden 95-110, Congress-i menden 1-3 aser Left-i menden 0-1 angütsü, ta

metetdaksü.

People's Pulse exit poll ajanga, Tamil Nadu nung DMK alliance (DMK+)-i menden 125-145, AIADMK alliance (AIADMK+)-i menden 65-80 aser TVK-i menden 18-24 angütsüa akok, ta metetdaksü.

Axis My India exit polls ajanga, Kerala nung UDF-i menden 78-90 nung takok angütsü aser LDF-i menden 49-62 angütsü ta asadangtet.

JVC exit poll ajanga, Assam nung BJP-i aniba NDA-i menden 88-101 nung takok angütsü, opposition-i menden 23-33 aser pparty tilatem/independents-i menden 2-5 nung takok angütsüa akok, ta metetdaksü.

BRICS-i West Asia tensa atema külem sangdong magütsütet: MEA

New Delhi, March 29 (Agencies): BRICS deputy foreign minister tem aser Middle East and North Africa (MENA) nungi ketdangsertem külem senden nung West Asia tensa atema külem sangdong ka magütsütet, kechiyong züngsem linüktem tsüingda ai-aura mekateti liasü, ta Ministry of External Affairs (MEA)-i metetdaksü.

BRICS Deputy foreign minister tem senden ya April 24 nü New Delhi nung ayongzüka amen.

Mongolbarnü osangbenertem den jembidang MEA otongdar, Randhir Jaiswal-i, BRICS züngsem linüktem tsüingda West Asia

tensa dak sendakba nung külem telemtetba magiteti liasü, ibayongji külem sangdong magütsütet, ta metetdaksü.

Paisa, taküm küm tetenzüklen New Delhi nung ayongzüka India-Arab League foreign minister tem senden nung külem sangdong ka agütsüteta liasü, aser iba sangdongji Palestine densema shilem agir ajaki pusema liasü, ta metetdaksü.

MEA-i ashiba agi, BRICS MENA senden ajanga ketdangsertem longjemer West Asia tensa atema tebilenba lemsateptsü atema maongka angu; talisa Palestine tensa aser Gaza nung nüburtem timtemba atema jembia.

Züngsemtemisa Lebanon nung ceasefire pelaa agizük aser UN peacekeeping forces (UNIFIL) amakba atema tebilemstsü akaba lemsatet, ta MEA-i metetdaksü.

Kasa senden nung Syria nung raraba sülen asentenshir linük yangershitsü atema inyakba aser Yemen, Iraq aser Libya linüktem nung security tensa atema jembia.

Ajioda züngsem linüktemi West Asia tensa asadang aser item tebilemstsü onüktem bentettsü atema maneni ken o jembitsü nüngdak ta bangjem.

Chabahar Port dak sendakba nung MEA-i, iba atemaji Iran aser United States naprongla den jembishinüdar, ta metetdaksü.

OFFICE OF THE
UNGER KOSASANGER PUTU MENDEN
(Village Council)
P.O. Chuchuyimlang, BPO- Unger Village- 798614
Mokokchung, Nagaland.

TENÜNGSANG AGÜTSÜR

Asür C. Lipok aser M. Achila Imsong na jabaso, **Wb.Tongpang L. Jamir**, Department of Social Welfare, Government of Nagaland nung 'State Commissioner for Persons with Disabilities' shimba atema Unger Kosasanger Putu Menden-i pa nem tenüngsang tulu agütsür.

Pai iba menden tongtetba ya konang tulu aser pai mapa tasenba agizüka inyakdang maneni pa nem shisa agüjang aser takok ngudakjang ta onoki sarasademtsür.

Ajak takoksang Tsüngremi pa maneni moajang aser tarutsü nunga pa wadang ajak nung len aniang, ta sarasademtsür.

Sd/-
(R. Tali Imsong)
Chairman
Unger Village Council



Sd/-
(Opanglemba)
Secretary
Unger Village Council

OFFICE OF THE
AOYIMKUM LANUR TELONGJEM
AOYIMKUM VILLAGE
DIMAPUR - 797113 : NAGALAND

Pelshishia Jaoker

May 2nd 2026 mapang 10:00 AM nungi Aoyimkum Lanur Telongjem-i Moatsü Mong ayongzüka lir, anungji Aoyimkum Senso sanger aser Aoyimkum süngküm-shi nung ali alia alirtem ajak ALT-i Moatsü Mong nung atentsü pelashishia jaoker.

Sd/-
President, ALT.

Sd/-
Convener
Organising Committee

LAND FOR SALE

North : 107 fts
South : 101 fts
East : 106 fts
West : 87 fts
Location : AtIndisen Village
Contact :
8798160994

OFFICE OF THE
KOHIMA AOR TELONGJEM
KOHIMA - 797001, Post Box Nagaland

Tanu 25th April 2026 anogo kohima Aor telongjem yimkong mongdang nung loktii melunga item telemtetbatem agizüka pangzünga ayur.

- 29th April 2023, Kohima Aor Telongjem Yimkong Mungdang lemtet No. 11 (2) nung KAT kübok züngsema alir senso ajaki asen Ao oshi jembitsü aser Ao oshi renloka aotsü asoshi renema aliba ama ano maneni KAT sapang nungi shilem tajung agia inyaksü nenshia lemteter.
- Government temzüng nung aliba ama tang nungi KAT kübok züngsema alir kibong aser kija shingiaia tanur küm 14 teküpok kidang teyariteper mesüra school nung azüngtsü asoshi mayütsü. Nisung kari iba lemtet nung tashi mangai ayuba mapang timtem kar atalokra pa/la jurila khuret asütsü aser Ao kin nem tenüng tamajung bener arutsüba asoshi KAT-i tapet temerenshi agütsütsü pangzünga renemer.
- Tang nungi KAT kübok züngsema alir züngsem ajaki Parliamentary election, Nagaland Legislative Assembly election, Municipal Council/Town Council election ajak nung pei temeten meyonngem (vote) sen yung mayoktsü aser temzüngi memelaba mapa kecha meinyaki ochishia pei temeten meyonngem agütsütsü asoshi tanü 25th April, 2026 Yimkong Mungdang nung Kohima Aor Telongjem züngsem ajaki mulunga telemtetba agia ayur. Aibelentem KAT sapang nungi tenük zünga repranga alitsü.

Tzükong terok Tirtem

- Ongpangkong
- Langpangkong
- Asetkong
- Jangpetkong
- Japukong
- Tzürangkong
- Watsü Telen Kohima
- Ao Kaketshir Telongjem Kohima

(Signature)
(T. CHUBAYANGER)
Tir, KAT
(Signature)
(Tongji Pongener)
Tongti Zülur, KAT



TIR YIMYIM YIMOBILEM (EDITRIAL)

DIMAPUR THURSDAY, APRIL (RONGCHII) 30, 2026

Temeten sayuba missionary !

Nagaland State Legal Service Authority (NSLSA) purtem nungdak nung amshitsü atema District shia asoshi Gauhati High Court nungi gari (Multi Utility Vehicles) agütsübaji ajanga Nagaland tesem ajaklen nübertemi temzüng ozüng ajanga agüja aliba senso ka temetentem indang tajungba meteta akümtsüsa temzüng ozüng meteter aser okatsürtemi takok ngua inyaka aotsü imlar. Nisung ka taküm nung tashi angudak aser tasü aitdak tesemji pei teinyaktsü aser pei temeten metetbaji lir. Aji oda, zülutsü aser azüngtsü metetba agi nisung ka tashi aser tasü aiter. Kasaji, alima nung atalokba osangtem metetba agia nisung ka tashi itdaktsür. Item dakji alaka, kodang nisung kati pei lokti aser yimten nung pei temeten meteta kümdir, pa mesüra laji tasü it-ita akümer. Aji oda, tangari asenok mezüngmeshiaka aser asen tangutsü tim magütsüaka, asenoki asen temeten aser asen shilem meshitsü tasü metetbaji, asenok tasü maitba agi masü saka asenoki asen temeten memetetba agi lir. Item temetentemji asenok nem yimteni temzüng ozüng nung lateta yuja lir, anungji senso ka asoshi item temeten keta aliba temzüng ozüng metettsübaji kanga tongtibang mapa ka asütsü. Ajisüaka, Tsüngrem angati tekümtet osang tajung indanga meshira, kodaser angashitsü ta Laishiba nung ashi ama, yimten tenzüng ozüng nung senso ka atema tangutsü, tagitsü aser teinyaktsü temeten aika lateta yuja liaka, itemji tonga oagi nübertem dang meshira, kodaser parnoki angatettsü ? Kechiyong, Center government nungi süli mesüra state government nungi süli, terenlok aser teyari agütsüba sentong aika nübertem asoshi lateta yuja lir, anungji item sentongtem ajanga agütsüba teyaritemji shitak angutsübajia senso ka temeten lir. Ajisüaka, asenoki asen temeten memetet nungji, asen angutsüba shilem ajak nisung kati okzüka bener aoyonga asenoki ola madoker. Aji oda, linük temzüngibo tanur shia nem angati kaketshisatsü shitak agütsüsüla aser mozü kidanga shirangertem teyari shitak angutsü tim ta lateta yuja lir, ajisüaka asenok school nung lesson junga magir aser mozü kidang anepalur mali anogo shia timtem takoksa jenti ajurur, ajisüaka nübertemi pei temeten meshia ola madoker. Gari lenmang majungba agi, gari raksaba dang masü saka gari lendong ajurur aser nisunga asür, saka nübertemi ola madoker, kechiyong nübertemi ibaji shiba tai ajanga atalokar memetet. Item temeten indangji metetlasang, nübertemi ola adoktsü aser nübertemi pei temeten meteta ola adokba lima nung terenlok mapa shitak inyaka aotsü. Iba lima nungji gari lenmang tajung asütsü, mozü kidang anepalur teti shitak alitsü, kaketreju nung kaketshisatsü shitak angutsü, government nungi angutsüba teyari nungi shingaia kecha shilema agizüka mayutsü aser shingaia shinga mashi mezüngmeshi masütsü. Ajisüaka, nübertem nem item temetettsütemji angatetdaktsütsü atema tesayur aser tashitemeteter kar nungdaker. Itemji 'Legal Missionary' asütsü. Atangji, item tangatetba agütsüba mapatemji State Legal Service Authority ajanga inyakba angur. Ajisüaka, mayimjemer, kechiyong yimtak yimtsüng tashi tonga oagi Legal Aid Clinic sentong ayongzüka, nübertem dang pei temeten shia angatetdaktsütsübaji tasak, ajisüaka aotsüla, kechiyong, talisa, tetsürtemia tetsür temeten aser taintemia tanurtem temeten aser senso shiai pei temeten meteta alitsübaji lokti ka tipdema aientsüba nung kangasa nungdaker. Atangji, alima nung nisung ka asoshi mapa dang masü saka tagitsüa lir aser senso ka asoshi temeten dang masü saka teinyaktsü mapaa lir, anungji senso kati pei teinyaktsü mapaa metettsüla aser pei temetena metettsüla. Iba jagi dang lokti nunga aser yimten nunga senso tajung ka kümtet. Item nungdaktemji ajak rajema tang agütsüba nungdak osettemji amshia, district shia nung, Nagaland State Legal Service Authority purtemi ano tali bendanga agüja inyaktsü imlar. Atangji, nübertem nem pei temeten aser pei teinyaktsü angatetdaktsütsübaji Legal purtem kisüng mapa masü, yangji yimten aser lokti tentet ajak dena lir aser osangkaket adoker aser osangbenertem shilema tuluka lir. Iba ama mapa ya sentong ka kümer ajak lungjemer süoki ia inyaktsüla.

OLEMSABANG

NLTP ACT 1989 AJANGA NAGA KHRISTANTEM TELOK ANALEMSAR OTIA RARATEPPER

~ K. LIMA LONGKÜMER

(Yashi adok nungi...)

Anungji jogo otia Dimapur District Citizens forum aser Dimapur nung aliba Civil Society Organization-i NLTP ACT 1989 akintsü ola adokker, parnok jagi yi (Rum) yoknürba acü parnoki ashiba agi yi ajanga Revenue akinür. Yi ajanga Revenue angütsübajibo sorkar tepilemtsü aji saka Nagaland nung ayoktsü melara Medical Deptt nung Doctor, Nurse aser staffs dang macü tongtibangsa Medical Deptt-ji nisung daküm shiranger anepalubaji tongtibangba lir, ano Education Deptt nunga Tesayur aser Students atema tongtibang lir aser koba linük cüdir süang Medical aser Educaiton Deptt anajiang temerükba tajungba aser bendanga agüja inyaktsütsüba Deptt saka kodaser Medical aser Educaiton Deptt anajiang yi ayokba nungiang Revenue anguba sen agi yaritsüba pilemmer-na? Nagaland 16 point agreement nung ibaji tongtibangba inokka aliasü sürabang thanga Deptt 40 shi nungjia Revenue agi kechinung shirnoksa yarir ta metetnür. Lenmang Contractor-temi Revenue makie inyakba-a melamela raksar nung nisung aser Man power aliba main Deptt anajibo yi (Rum) ayokba Revenue nungiang yaritsüba kulokjia Naga nungera shiba sentong? Nagaland nung man power alibaji ano Police Deptt dennabo asem (3) dang lir.Süra asem (3) nung anajibo Naga nungeri atakatemala yi Revenue nungiang yaritsü ta acübaji parnokjibo mim (poison) chidaktsüdi ta indang-indanga shitetbaji tangatettsü tasak. NLTP ACT 1989 ozüng meyagludangbo Deptt ana-ji yi ayokba Revenue nungiang yaria liasüba anen ta tanu-asüng nungiang angzükker

Asenok Naga nungerbo ajak Khristan tajung dang saka tangatetba palala anungji asenok ajaki amai yi nokdangdi ta ozüng liaka ajak külemi lenti nung mesüra sabang ka nung külemi lungjemtsü-a memulungba Naga Khristanem lir.

Mapa tazü (tasen) ka inyaktsü bangjimtepperba macü saka asen tsürapor-i inyaktettsüba koba Naga sorkari ozüng tashitait kumja akizükka asenoki koda koba yaim nung inyaktsü aser koma inyaknungang mapaji takok angutsü ibajiang asen jakdang lir, mapabo kecha meinyak yur shidi ou mupung nung tai toteppa mekazüli ta mepishir.

Nenok Theology azünger temetetter taser onok ama samesa daküm tiluja nümjia reprangra yongsu dak teka arangtsü. Alima nung nisungi bi sasa olua ato-angemma pilemtsü akok saka Laishiba nung sayutsüngir tabu 3 tatemlen nisungchirtem shiruru den tia kasa ta zülua angur aji ou rangpen. Kü daküm teraksa aser tamajung nung aliba daküm nenok tang putu nung khuret (responsibility) apenner nümstsür ama pilemma alitsü ajisaka asenok ajak kasa wadang nung khuret cua pilemma tamang sarasadem nung yaridaki ta iba shiti ajanga rajemtsür.

Tanü Naga nunger ajaki NLTP ACT yabo Tsüngrem tenzükker aser metenzükker aser tanur tain ajaki khuret kasa akia inyaktsüba wadang lir. Alima nungi nisung shia dak tashidak meyimlaba ataloktsü, ajibo asen tia dak kütta lir, saka shidakba agibo Naga nungerbo yi agi meshirangtsüba cürung ano yi agiang tashidak kaor anojungi lanur tajung jendi daküm raksar aser sümadakki. Ibaibo sorkar aser Tsüngrem tenzükker kisüng khuret macü. yi achemba ajanga nisung dak tashidak aesü nung kongshir. Anungji Nagaland nung nisung asüba ya 70% bo yi ajanga raksar anügoshe sädakki ta asadangtetter. Nagaland nung Dimapur kisüng nungi telok anadi NLTP ACT 1989 akintsüla ta ola adokbaji mangashe ama toktsüner, kechiyong Naga nungeri yi nokdangtsü mapa künyongi meinyak. Anungji mapa ajanga inyaka sayutsü sorkar den shesa lemsateptsü nungdakker. Tejak o tejakna ajuruteppa jempitsübo mepilemmer, Trongdong shitsür shidi züluteppa Jagibo kodanga tepilemba mataloktsü. Taqa NBCC aser CM den MLA-tem CM kidang ajuruteppa sensaksembaji küm 37 nung kün aser mezüngbuba meeting acütsü, kechiyong ibai Dimapur District Senior Citizens Forum aser Dimapur nung aliba civil society organization ajanga ola adokba ajanga aoksar CM & MLA-tem den ajuruteppa ta angatetter.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Baptize California-i baptiba sentong tuluka ayongzüka agitsü



2025 küm May 3 anogo nung 'Baptize California' sentong nung tangokba noksa nung angur.

April 29, 2026: California nung aliba Arogo tuluka nung pastor kati tenzüka evangelism ministry kübok tesüiba küm ishika tsüngda nisung meyrjang aika baptitsüogo aser parnoki taruba ita nunga baptiba sentong tuluka ayongzüksü tebilemba lir.

Baptize California ya Pastor Mark Francey-i tenzüka ministry ka lir. Pa ya Orange County nung aliba Oceans Church nung pastor lir.

Baptize California-i "Baptize the World" sentongji May 24 nü ayongzüka akatsü.

Osangbener den jembidang pastor Francey-i, "Iba ya Tsüngremi onok nem apitetdaksüba sentong ka lir ta onoki amanger. Mezüng küm Southern California sentong agia liasü, kümnabuba nung California tesem ajaklen iba sentong agi, yaküm America nung agi aser takümbo alima tesem ajaklen agitsü," ta metetdaksü.

Taküm mezüng Baptize California ya alima tesem

balala nung agitsü, aser item sentong nung nisung meyrjang aika baptitsü imlar.

Francey-i, "Iba sentong atema Baptize the World staff temi maparen ajak achaayanga inyakdar," ta metetdaksü.

"Iba anogo nungji nisung kwi baptitsüar onoki memetet. Nisung meyrjang aika mesüra 100,000 dak tali-a baptitsüa akok. Onoki zütsük dang achaayanger aser zütsükji tzi nung onloktstsü atema Arogo yarir. Kwi aputsüar ibajibo Yisu melung dang," ta pai ashi.

Iba sentong ajungkettsüba dak sendakba nung shilem agiba linük ajaki peipei oshi nung pei linük nungja amshia "Baptize the World" advertise asütsü, ta pai ashi.

"Tatishitsü agi, Baptize Denmark mesüra Baptize Canada-i Baptize the World den senteper iba sentong ajungkettsütsü," ta Francey-i ashi.

"Item sentongtem nung adentsü atema Yisu den tesendaktep malirtema Tenla ki

mesüra sentong agiba tesem jagi aotsü, aser osangtajung angashiba sülen Yisu agizüka yangjisa baptitsü, ta onoki amanger," ta pai metetdaksü.

"Tesümgangtsü taküm kuli aika angashitsü aser taküm aika melenshiba otsü angashitsü atema onoki sarasademer. Tesüiba küm asem tsüngda item sentong ajanga aika kümzüko, baptiogo aser local Arogotem nung züngsem kümogo," ta pai metetdaksü.

"Tsüngrem yimli tuluba akümba aser Arogo ainba ngua onoki item ya inyaker," ta pai ashi.

2024 küm Pentecost Sunday anogo nung Baptize California sentong nung nisung 12,000 dak tali baptia liasü aser ibaji US puti otsü nung khenyongi nisung teimtiba baptiba liasü.

Ano yaküm June ita nung Baptize California-i US nung aliba Arogo 600 den senteper ayongzüka sentong nunga nisung 28,000 dak tali baptia liasü.

ANOGO ABEN TSÜNGREM DEN

Tsüngrem Ne Den Lir

Yamai temeranger Kibubai ashir: "Item anogo nung ya oda ataloktsü, kintem oshi ajak nungi nisung teri Yihuda nunger ka dak sü nung sotter ashitsü, onok nenok den aotsü, kechiyong Tsüngrem nenok den lir ta onoki angashiogo. Zak. 8:23.

Tsüngremi Pa nüburtem Tanela Temeshi agi sünga lidaktsüner idangji tangari Pa ain parnok dak aliba metettsü.

Ainkar Zakaria ajanga, Tsüngremi Pa nüburten dang parnok pa atenba balaka sayutsüla ta ashi. Tsüngremer nüburi Pa anasa jajara, alima ajungai parnoki Tsüngrem metetta lir ta metettsü. Nüburi Tsüngrem chir ka ngura, parnoki pa/la den alitsü yongyatsü kechiaser yamaji aliba ajanga parnoka Tsüngrem anasa alitsü ta parnoki bilemstsü. Tekong 20 nungi 22 tashi nung kintem teyongya alidang ainkari ashir.

Tangar ne tsütsüi anir arutsüsa Khrista akaba kuli ne taküm nung alitsüla. Parnoki parnok chirtem ne chirtem den lidaktsünütsü kechiaser ner chirtem Tsüngrem metetba nung indaktsü. Mapa agütsürtemi na parnok mapa nung anioktsütsü, aser tanishir südaktsünütsü kechiaser parnoki na Tsüngrem den tsüngchir süa aliba metet. Ne taküm aser kibong tangar atsüa aruba tashi (magnetic) ka ama alitsüla. Parnoki ne den aser ner kibong nung Tsüngrem dena lir ta bilemba ama ne taküm aser kibong alitsüla. Nai Khrista ne den aliba kuli tali sayuli, nüburtem tali Pa dangi atsür aruli ta asütsü.

ICC-i reshikangshi ajangshiba Khristantem yaritsü ayongzük

April 29, 2026: Tawa sentong ka nung International Christian Concern (ICC) Tir, Shawn Wright-i reshikangshi ajangshiba Khristan million 388 tenzüksü atema Khristan lenir 70 den pa mangdang lemsatop.

Europe nung aliba yimti ka nung ayongzüka Religious Liberty Partnership (RLP) sentong nung Khristan organization balala nungi lenirtem aikati shilem agia aden.

RLP tenzükertem rongnung ICC densema lir.

RLP yagi alima tesem balala nung tamangba yimsü temeden atema inyakba den külemi reshikangshi ajangshiba Khristantem tenzüker.

RLP sentong nungji okila jembitsü atema ICC Tir Wright jaoka liasü, ajioda iba sentong nung Kibubai pa den jembiba mangdang pai lemsatop.

ICC Tir akümba sülen mezüngbuba ita 6 tashi Wright-i ICC atema Tsüngrem nungi mangdang meshia liasü aser sarasadem tamangtirtem den aiben sarasadema aru.

Wright-i, "Reshikangshi ajangshiba Khristan million 10 tenzüksü atema Tsüngremi ICC nem khuret agütsü ta ni amanger," ta metetdaksü.

Paisa pai mapang kanga indoka Tsüngremi melungba inyaktsü atema mangdang meshiba lemsatopa, "Iba züngya [million 10] ajanga ni kanga aoksa liasü, ajisüaka ibaji tamang agi inyaktsü atema Tsüngremi ni ajar ta ni meteta liasü. Süra reshikangshi ajangshiba tanüngba tamangertembo koda? ta ni asüngdanga liasü" ta metetdaksü.

Ministry aikati project balala ajanga reshikangshi ajangshiba

Khristanten tenzüka arudar.

Wright-i, "Ministry balala tsüngda longjemer inyaktsüla. Mezüngbuba nung longjemer sarasademtsüla, iba sülen o lemteptsüla aser longjemer inyaktsüla," ta metetdaksü.

"Kechiyong Tsüngremi lemsaer meinyakdaksüner. Pai imlabaji Pai tejangja sayur-ajak ka küma longjemandaktsüner. Longjemtsüji shimtsü lenmang ka masü saka kodak nungi yokba asalentong ka lir," ta pai metetdaksü.

"Tatem nungbo mangdangji- lenla ajaklen nungi reshikangshi ajangshiba Khristantem tenzüksü atema lir. Asenok telongjemji mapa inyakba dang masü saka asenoki sayutetba kuli lir. Kodang asenok longjemdir alimai asenok dak amangtsü. Kodang asenok rongnung

telemsa lidir osangji raksatsü," ta pai metetdaksü.

Wright-i, ministry lenirtemi meranga inyakba den külemi kati ka meimba tatishitsü sayutsüla aser Khristai Arogo meimba mapa agi sayutsüla, ta metetdaksü.

ICC-i alima tesem aika nung reshikangshi ajangshiba tamangertem yarir aser tasü itta pei tamang jenjang manokshitsü atema nungita yarir.

Washington nung amenoka aliba ICC-i Africa, MENA region, South Asia aser Southeast Asia nung aliba itta pei tamang jenjang manokshitsü atema nungita yarir.

Washington nung amenoka aliba ICC-i Africa, MENA region, South Asia aser Southeast Asia nung aliba itta pei tamang jenjang manokshitsü atema nungita yarir.

project aika inyakdar.

ICC dak alia tanga ministries-ia alima tesem balala nung reshikangshi ajangshiba Khristantem yaritsü atema project aika inyakdar.

"Iba ya asenok dak tenük yokba lima dang Khrista temeim sayutsü atema lir. Adianutem, nisung million 388 ji züngya ka dang masü, parnok nisung shiaji asen kibong nung aianu aser adianutem lir. Tsüngremi mongpu tasen ka atema asenok ajar; peipei sasep nung inyaktsü atema masü saka longjemer inyaktsü ajar," ta Wright-i metetdaksü.

Wright-i iba tayongzüka agütsüba sülen ministry 9 nungi CEO tem online ajanga sarasadem tenzüko; parnoki mapang shia sarasademtsü aser project balala tenzüksü atema jembishinü tenzüksü.

AO OSHI ANGAZÜKDAK:

TANÜ ANGAZÜKTSÜBA OJANG



Yamok

(v) akhümbang , milen sangwa agi ajaklen sangwadaktsü (light up, lit up)

* Milen tesangwa agi takdang kinük ajaklen yamoka aya.

Yangayanga

(adv) tanem tanemi, meilongi, lasa lasa (very slowly)

* Tajungba yangayanga ozü kidangi atu.

OLONG PAITEP # 7489

15x15 crossword grid with numbers 1-15 indicating starting positions.

TIPLÉN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsümapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. _ _ _ _ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. _ _ _ _ _ kibur - (5)
13. Tebur tembar tsüngda jatepba - (4)

OLONG PAITEP # 7488 TELANGZÜBA

TIPLÉN :

- 2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso.

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.

NAI-A YA METETTER



London nung April 25 aser 26, 2026 anogotem Italian chef 100 tema adenshir "World's Longest Tiramisu" yangluteta Guinness World Records nung zülüokogo. Italian chef temi 440.6 metres (1,445 feet) tasazük tiramisu ka yanglu aser iba ya Empire State Building (1,250 feet) dang nungi talangba lir.

Chelsea Old Town Hall nung chef temi anogo ana agia tiramisu yanglu aser iba iba dessert yangludang ladyfinger biscuits 50,000 shi aser eggs 3,000 tema amshia liasü.

Raja Raghuvanshi'er kibongi bail temelaba magizüker



Shillong, April 29, 2026 (Agencies): Meghalaya court-i Indore nungi businessman Raja Raghuvanshi kinungtsü Sonam nem bail agütsüba atema Raja'er kibongi ashishiteper.

Raja tepsetsü tasa atongba ya la liasü aser Central Bureau of Investigation (CBI) nem bushisüngdang südaktsüsüla ta Raja'er kibongi akhanger.

"Meghalaya High Court nung onoki bail order anema ken o benoktsü. Sonam atema lawyer-i la bail application indang jembidang Meghalaya Police ajanga la dang la apuba indang kuli tejangja mashi ta shiogo" ta Raghuvanshi tedi Vipin-i ashi.

Iba ya yaküm Meghalaya

nung Raja Raghuvanshi aser kinungtsü na honeymoon amungdang May 23 nü pa samaba ken o lir. Raja indang mang ya June 2 nü Sohra, East Khasi Hills district nung lungren ka nung angu.

Iba tatalokba sülen June 9, 2025 nü Uttar Pradesh kübok Ghazipur nung Sonam apu aser la Shillong nung tepuokdak yua lir.

Iba ken o atema police-i Sonam aser la tetong Raj Kushwah na dena nisung 8 anema 790-page chargesheet benoka liasü.

Item ken o tem liaka taoba Mongulbarnü okadak kati Sonam nem bail temelaba agüja liasü.

"Meghalaya Police-i testüiba ita 9 tashi jungjunga bushisüngdangogo saka ita ka ana tsüngda inyakyim melenshiba mangateter. Onoki sorkar dang nungi langka ka dang akhanger aser ibaji ozü tai maketba jabaso nem temeten lir" Raja tetsü Uma-ia ashi.

Iba ken o nung kari teka aiba aser inyakyim nung metokmeperi kar alitsü akok, kechiyong onok nem chargesheet copy magütsü aser iba jagi onoki kulitem memetet ta Raja tedi Vipin-i ashi.

Iba ken o High Court nung angadanga arudar saka Raja'er kibongi iba ken o CBI nem bushisüngdang südaktsünüba shiogo.

Manipur nung sepaitemi bunkers 12 raksatsü

Imphal, April 29, 2026 (Agencies): Manipur nung sepaitemi tesüiba ghonda 36 tsüngda tesem balala mita aodang prangpong-injang aser tapoktsü aika ngutetogo aser bunkers 12 raksatsüogo.

Ukhrul district nung Litan police station kübok bunker 7 raksatsü aser Kangpokpi district nung Saikul police station kübok

pungu raksatsüogo. Maneni, sepaitemisa Maovom village nung prangpong aika nguogo. Parnoki AK-47 rifle ka, carbine ka, single-bore rifle pezü, pistol ka, improvised mortars (pompi), grenades, 81 mm mortar bomb aser tanga explosives ngutetogo.

Iba maparen ya Assam

Rifles-i Manipur Police den külemi inyak. Iba mapang Kakching district nung PREPAK (PRO) ka apu aser Tengenoupal district nunga Indo-Myanmar arrtsülen PREPAK (PRO) aser PLA telungpurtemi apu.

Ukhrul district nunga nisung kati arrtsü ajanga Rs 36 lakh belentsü merandang apu.

AR-i Changlang nung NSCN (Khango) aser OGW ka apu



Itanagar, April 29, 2026 (Agencies): Assam Rifles-i Arunachal Pradesh kübok Changlang district nung NSCN (Khango) cadre züngsem ka aser over ground worker (OGW) ka puogo.

Osang tejangja ka angazükba sülen parnoki April 28 nü Rima-Putok Circle nung mita ao. Iba tesem nung OGW kati Naga telungpur ka lir ta Assam Rifles-i osang angazüka

liasü. Iba mapang sepaitemi NSCN (Khango) züngsem Kamnong Pangtha aser Changlang nungi OGW Gopang Negimu na apu.

Tenaprong ya tashiyim agi sen saruba nung shilem agia aru aser lanurtem telungpur asütsü aniokba maparen inyak ta bushisüngdang ajanga metetogo.

Tenati Changlang aser

Jairampur tesemtem nung temulung agüja inyak ta ktdangsurtemi ashi.

OGW Gopang Negimu-i Rima-Putok Circle nung NSCN (Khango) züngsemtem NSCN (Angmai) telok nung adentsü maparen nung yarittep.

Iba ya NSCN (Angmai) telok züngsem teimba akümtsü aser tashi itshitsü atema inyakba liasü ta security agencies-i ashi.



GOVERNMENT OF NAGALAND

DIRECTORATE OF TECHNICAL EDUCATION

Nagaland: Kohima-797004



NO.DTE/SCTE/6/2023-24/46

Dated, Kohima, the 29th April, 2026

NOTIFICATION

The candidates selected to undergo 3years Diploma Programmes within the State are hereby declared based on HSLC merit and preferences exercised by the students. Result details and **IMPORTANT INFORMATIONS** for admission are available in the Polytechnics, Directorate Notice Board & website <https://dte.nagaland.gov.in>

IMPORTANT INFORMATION :

- Issue of Nomination letter : 30th April - 4th May 2026
- Last Date of Admission for 1st Phase : 5th May 2026
- The remaining vacant seats shall be notified and fill up on the basis of first come first basis after the 1st phase admission is over i.e 5th May 2026.
- Failure to collect the Nomination letter for admission within the stipulated time shall amounts to cancellation of the candidature and no further request/complaints shall be entertained.

Sd/-
(ER. VIPULHOU LHOUNGU)
Director

OFFICE OF THE
UNGER KOSASANGER PUTU MENDEN
(Village Council)

P.O. Chuchuyimlang, BPO- Unger Village- 798614
Mokokchung, Nagaland.

TENÜNGSANG AGÜTSÜR

Tawa sangdongba HSLC examination nung St. Mary's Residential School, Alichen nungi Mr & Mrs. Takotemjen'er jala **Imnayangla**-i Top 8 jenjang nguteta asen nùbur dangi konang aser tetushi bener arutsüba atema Unger Kosasanger Putu Menden-i tenüngsang agütsür. Lai bendanga agütsür azüngba ajanga tajungtiba jenjang tongtetogo, aser la tarutsü jenjang tajungba sùdakjang ta moatsür.



Takoker-i maneni tematiba jenjang nung takok ngua la ajanga dangara ajungmesotsü imlaa atar.

Sd/-
(R. Tali Imsong)
Chairman
Unger Village Council

Sd/-
(Opanglemba)
Secretary
Unger Village Council

Trump-i nuclear deal atema ano Iran amokmerener



Washington, Rongchii/April 29 (Agencies):

Bodhbarnü US Tir Donald Trump-i Iran nem tekum dangtsü tesashi ka agüja, taoba hopta Islamabad nung tanaben jembishini akatsü aliba ajungbena athiba sülen Tehran-i joko nisung tajungsang den ken o mejembitsü ta ashi.

"Iran-i par mapa külemi meinyakteter. Parnoki non-nuclear deal ka nung meyonngem agütsütsü memetet. Parnok tekeraba nung saksalemba tajungba asütsü! President DJT," ta Trump-i Truth Social nung post ka nung ashi aser AI amshia yangluba noksa ka lemsatep, kong pa assault rifle ka amer "No more Mr Nice Guy" ta tekolaklen

zülua liasü.

Ita tetenzüklena Strait of Hormuz nung US-i mokdanga aliba magientsü telemtetba agiba sülen Iran-i iba strait tanaben shibangba sülena Trump-i iba mesük tekum dangtsü agüja liasü.

Washington-i Tehran dang uranium enrichment alena ayutsü aser nuclear nok-nü yangluba nungi nokdangtsüsa "non-nuclear deal" tesashiba ka agizüktsü ajungshiba mapang ka nung Trump-i Iran dang tang tesüsaba tekum dangtsü ya agütsür.

US negotiators tem ano jembishini atema taoba hopta tatemlen Islamabad-i aotsü liasü, saka Trump-i iba sentong ya

thitsü. "Asen ket nung nüngdakba tashi ajak lir," ta tiri Fox News dang ashi aser Iran-i jembinüra parnok asen dangi arutettsü mesüra parnoki call sütettsü, ta shia liasü. Vice President JD Vance-i anir mezüng jembishinüba nung tenzüngzüktep kata meyangluteti tembang.

Iba rara tembangtsü atema pa kanga ariteper südi ta jembiba langzüa pai Truth Social nung, "Alima nung mapang ajak kü ket nung lir, saka Iran ket nung mali - anütetsü jajatar!" ta zülua liasü.

Trump-isa Iran indang mitkar tashi kanga mejungi ajemtsüogo aser mokdang shidak akang-akanga lir ta ashi. Ano pai post ka nung, "Iran indang Navy ya tzüyim telung nung lir, par Air Force raksatsüogo, par Anti-Aircraft aser Radar Weaponry samatsüogo, par lenirtem asen den mali, Blockade ya tesashi aser tashi tait, aser tamajungba ang akumer - Par tsütsü mapang mali!" ta zülua liasü.

Tehran yagi US-i Iranian ports mokdanga aliba agiena rara tembangba sülen ang Strait of Hormuz ya tanaben lapoktsü ta ashir.

Germany-i Russia atema itdangiter Kazakhstan nunger ka apu

Berlin, Rongchii/April 29 (Agencies):

Germany nunger ketdangsurtemi Russia atema itdangiter ka asütsü ta temlung melemba Kazakhstan nunger ka Berlin nung puogo, ta German Federal Prosecutor Office sangdong ka ajanga metetdaksü.

Nisungba ya Sergej K ta jangjaogo, aser pa ya taoba küm May ita nungi Russian intelligence service ka den Germany nungi maneni tongtepratepa liasü, ta pa apuba sülen anogo ka lir office yagi Bodhbarnü iba osang metetdaksü.

Prosecutor temi ashiba agi, Sergej K-i pa indang Russian handler nem Germany-i Ukraine nem military teyari agütsüba indang osang tejangja agütsü, kong drone aser robotic system tem yangluba company tem densema liasü. Paisa, Berlin nung NATO military convoy tem aser public building tem

indang noksa lemsatepa liasü.

Pa inyakyimtem rongnung Germany nung tanga itdangiter tem bushitsü asoshi teyari agütsütsü mulunga aliba lemsatepba densema lir, ta prosecutor tem yagi shisem, saka pai iba mapaji inyak minyak iba indangbo osang tejangja magütsü.

Ken o dak sendakba nung Kazakhstan aser Russia nati kecha telangzüba agüja mali.

Tang Sergej apuba ya Russia-i 2022 küm nungi Ukraine amak tenzüka sülen Moscow den sendaka aliba itdangiter tem indang ken o tesüsabuba asütsü.

Germany aser Russia na meyoktepba nisung ana 2024 küm Germany nung United States military amendaka aliba tesem amaktsü tasa asaba atema apu. Ukraine nem anüolen aliba linüktemi military teyari agütsüba nung tetsükdaksü adokdaksütsü

atema iba jenjang agia liasü.

German police-isa, tahh melena Germany atema mapa balala inyaksür ishikabo puogo.

Iba ita tetenzüklen Berlin-i, Russia indang ambassador jaoka, parnok amokmerenba atema aija liasü.

Iba mapang Berlin indang Federal Foreign Office-i ashiba agi, amokmerentem ya Germany-i Ukraine nem teyari agütsüba nung tetsükdaksü adokdaksütsü atema liasü. "Onok telangzüba tejangja: onoki tsüba mali. Iba amala amokmeren aser Germany nung itdangiter balala toktsüba ya agizütsü makok," ta Foreign Office yagi ashi.

Germany-isa, 2023 küm Social Democratic Party züngsemtem cyberattack asüba atema Russia-i teyari agütsüba hacker tem aitsüogo, saka iba taitsüba ya Germany nung Russia embassy-i magizüki liasü.

Israel-i Hamas telungpur tanishir Shambari tepsetogo

Tel Aviv, Rongchii/April 29 (Agencies):

Bodhbarnü Israeli Defence Forces (IDF)-i Iyad Ahmed Abd al-Rahman Shambari ya Palestine nunger telungpur telok Hamas indang military intelligence nung operations department tekolakba liasü ta ashi.

Hamas-i October 7, 2023 nü Israel amakba nung al-Rahman Shambari ya tasa yanglur tejangja nübu ka liasü. Hamas-i iba anogo Israel amakba sülen Israel aser Hamas tsüngta rara tenzüka Israel-i Gaza Strip nung ground operation tenzüka Hamas kiralongrar den civilian meyerijang aika tepseta liasü.

Ceasefire ajanga Gaza rara ya tuluka anenogo, saka azüdokshi manener aser iba ceasefire tenzüker Palestine nungi 818 tepsetogo ta Gaza indang health ministry ajanga

ashir, koba Hamas ketdangsur kübok lir aser parnoki sangdongba nung United Nations-ia tamang akar.

Kasa mapang Gaza indang civil defence agency ajanga AFP news agency dang ashiba agi, Gaza City anüolen Al-Rimal kiyong nung drone kati missiles ana gari ka dak khaloktsüba nung nisung pezü asü aser trok yiru.

Gaza security ketdangsur kati asürtem rongnung ana jangjatsü aser pai ka Hamas commander Iyad al-Shanbari aser ka par jabaso Salah ta ashi. Pai ano nisung ana indang yabo kecha mashi.

October 10 nü ceasefire sangdongaka Gaza nung anogoshi azüdokshi lir, kechiaser iba ceasefire nung aibelener ya Israel mitkar aser Hamas telungpur kati ka dak tai tongloktsüteper.

Nigeria nunger sepaitemi telungpur 18 tepset

Maiduguri, Rongchii/April 29 (Agencies):

Borno state kübok tesem balala meita aoba mapang Nigeria nunger sepaitemi Islamist telungpur 18 tepsetogo, ta military-i Bodhbarnü sangdong ka ajanga metetdaksü.

Linük northeast len Islamist teloktem anema security force temi jenjang tali agiyonga aoba mapang ka nung tang iba ya atalokogo.

Borno state ya tasazük Ireland den kasashi lir aser iba state ya Boko Haram aser parnok den sendaktepa aliba teloktemi kanga timtem agüja arudar. Küm 17 tashi telungpurtemi timtem balala agüja aruba mapang nisung meyrejang aika tepsetogo aser nisung million 2 shi pei talidak ki toktsür jeshia odaktsüogo.

Military otongdar Sani Uba-i ashiba agi, air force unit tem

asert local auxiliaries tem den inyakba sepaitemi Timbuktu aser ?Bulabulin arem mein meita ao. Parnoki telungpurtem tesep aser supply network tem dak rangloker jenjang agia liasü.

Bulabulin nung telungpur terka aser Timbuktu tesem nung telungpur tenet tepsetogo, ta Uba-i sangdng ka ajanga metetdaksü.

Tawa military base tem amakba mapang ketdangsur tejentem densema sepaitem aika tepsetba sülen iba tesem telungpurtem temendakdak raksatsütsü atema jenjang agiyonga aruba nung shilem ka ama iba meita aoba setong ya benoka inyaka liasü.

Meita aoba mapang tayimtsü aser drone temi surveillance nung teyari agütsü aser jenshia aoba telungpurtem pudentü jenjang agi tenzüko, ta Uba-isa ashi.

World Cup nung tebang nembanger jembiba asayar nem Red card agütsütsü



Rongchii/April 29, 2026 (Agencies): International Football Association Board (IFAB)-i agizükba temzüng ozüing tasenba kübok football asayartem shirnoki opponent mesüra tanga asayartem den mangatettep adoka asatepba mapang tebang nembanger tem nem red card agütsütsü.

North America nung World Cup masaya tsüingda yimyayimpong tamajung beshiba azioktsü atema FIFA-i agizüker aliba amendment tem pass asütsü asoshi board senden ka Mongolbarnü Vancouver nung mena liasü.

"Mangatettep adoka asatepba mapang asayar kari danga tebang nembangra parnok nem red card agütsütsü," ta IFAB-i ashi.

UEFA Champions League nung asaya ka asayaba mapang

Benfica nunger asayar Gianluca Prestianni-i pai ashiba merprangtedaktsütsü atema jersey agi tebang nembanger Real Madrid nungi asayar Vinicius Junior racially abuse asüba sülen tang iba temelenshi ya bener aruogo.

Kasa mapang nung ano amendment tasen ka ajanga, referee-i telemtetba anema ground toktsür aoba asayartem tem red card agütsütsü. Kasa ozüing ya par team ground toktsür aotsü ajungmesoba team ketdangsürtem atema-a asütsü.

Africa Cup of Nations (AFCON) final nung mangatettep adoka Senegal team-i ground toktsü aoba sülen FIFA tir Gianni Infantino-i temelenshi asoshi nongshia liasü.

January ita final asayaba mapang goal 0-0 agidang host

linük Morocco nem penalty ka agütsüba sülen Senegal team yagi ground toktsür ao. Iba sülen minute 15 lir asaya tenzükshi, saka Morocco team-i goal magütsütet. Senegal team-i mapang apuloktsür asayaba mapang goal ka idakja parnoki asaya akok, saka African football indang governing body appeals panel kati iba titel ya parnok ket nungi aginja liasü. Iba ken o ya Lausanne, Switzerland nung Court of Arbitration for Sport nung angadangsü.

Red card ozüing tasenba ya mandatory masü, saka parnoki FIFA amala asayamung ayongertem nem iba ya amshitsü asoshi maongka agütsü.

IFAB-isa, World Cup nung shilem agitsü aliba team 48 prongla nem iba amendment indang ya taruba hoptatem nung metetdaktsütsü, ta ashi.

Champions League: PSG-i goal 5-4 agi Bayern kokogo

Rongchii/April 29, 2026 (Agencies): Parc des Princes nung Paris St-Germain aser Bayern Munich na Champions League semi-final mezüingbuba leg goal teku tashi agüja kanga toktepa asayaba sülen PSG-i goal ka agi kokogo.

Asaya nung goal pongu ya asaya mezüingbuba shilem nung idaktsü aser iba sülen ano asaya tanabuba shilem nunga PSG puri kanga junga asaya-a parnok goal asem agi tejakdang aküm.

Ajisüaka Bayern pur shirnok Bundesliga akokba sülen asayamung tongtibang asemprongla akoktsü atema meranga asayadar parnokia goal anabo küptok, saka goal ka midaktsüteti asaya makok.

Asaya nung mezüingbuba goal ya Harry Kane-i penalty ka ajanga idaktsüba sülen PSG puri asendshir kanga junga asaya-a parnok tejakdang aküm.

PSG atema Khvicha Kvaratskhelia-i ball kanga junga belenshia lur mezüingbuba goal idaktsü aser iba sülen Joao Neves-i ball kanga junga tongokja parnok tejakdang aküm.

Ajisüaka Michael Olise-i pa kijai ball kanga junga bener lua

Matvey Safonov adena ball metsüoktsü aser goal kasasa aküm.

Asaya mezüingbuba shilem ya goal kasasa idaktsür tembangtsü asütsü ta bilema aliba mapang Alphonso Davies-i handball ka menaba sülen PSG nem penalty metsütsü atema maongka agütsü koba Ousmane Dembele-i aibelen mesüi idakja liasü.

Asaya tanabuba shilem asayatsü atema Bayern pur temlungtetba tulu nung ait, saka PSG puri maneni asaya azioka liasü.

PSG atema Achraf Hakimi-i agütsüba ball ka Kvaratskhelia-i idaktsü aser Dembele-ia goal ka idakja parnok goal asem agi tejakdang aküm.

Iba sülen maneni Dayot Upamecano aser Diaz bati goal kaka idakja parnok nem draw danga asütsü asoshi maongka agütsü, saka goal pongububa magütsüteti parnoki asaya makok.

Team ana ya May 6 nü Bayern pur indang ground nung tanabuba leg asayatsü aser takoker ya Arsenal mesüra Atletico Madrid na rongnung ka den final asayatsü.

Sri Lanka sorkari khen atema cricket board achaayangtsü

Rongchii/April 29, 2026 (Agencies): Sri Lanka sorkari linük cricket board aziokkogo, aser ashiba agi, board structure yanglushitsü atema lenmang lapoktsütsü asoshi parnok khen atema boad ya achaayanga atatsü.

"Sri Lanka Cricket (SLC) ketdangsüba inyakyim ajak khen atema Ministry of Youth Affairs and Sports kübok yua atatsü," ta ministry-i Bodhbarnü sangdong ka ajanga metetdaktsü.

Tang cricket asaya dak sendakba nung ken o bentettsü aser structure yanglushitsü atema committee ka yakta shimtsü, ta kasa sangdong ajangsa metetdaktsü.

SLC ya linük nung saisabong lokti tentet takartiba lir, saka iba board ya ochi mashi inyakyim aser ketdangsüba meshidakba atema aija arudar.

Alima ajunga nung cricket asaya achaayangba lokti tentet;

International Cricket Council-i, 2023-2024 küma iba ana atema Sri Lanka suspend sütsü. National board ketdangsüba nung sorkari jushiba atema iba jenjang agia liasü.

Sorkari jushiba sülen SLC tir mapa pezübenbuba abensang Shammi Silva-i Mongolbarnü mapa toktsüogo. Pa den committee ajunga mapa nungi anenogo.

Sri Lanka-i taküm February aser March ita India den T20 World Cup co-host liasü, saka parnok kanga kara tsükatok.

Silva ya mezüingbuba 2019 küm Thilanga Sumathipala melena SLC tir aküm. Küm tem tsüingda board nung pa jenjang yanglushi aser term pezü tashi inyakogo.

Pa tir asüba mapang Sri Lanka tetsür aser tebur team napronglai Asia Cup akok. Ajisüaka national team ya ICC asayamungtem nung junga masayateti arudar.

Arjun Tendulkar T20 Mumbai League auction pool nung züngokkogo



Rongchii/April 29, 2026 (Agencies): Wicketkeeper-batter Siddhant Addhatrao aser all-rounder Arjun Tendulkar na tawa tembangba domestic season nung Pondicherry aser Goa nungi asayaka tena T20 Mumbai League auction pool nung shilem agitsü atema temelaba agütsüogo. Iba league atema auction ya May 2 nü agitsü.

Tendulkar aser Addhatrao

naprongla ya Ranji Trophy asayar lir aser tena base price sen lakh 5 category nung züngoksemtsü. Iba ya ajak dang temaba jenjang lir.

Addhatrao shiba 2024-25 season nung mezüingbuba Ranji Trophy asaya liasü, pa taoba küm domestic cricket nung Pondicherry tenüing nungi asaya aser Tendulkar ya Goa nungi asaya arudar.

MCA temzüng ozüing kübok

local asayartem shirnok tanga association nungi guest asayar ama asayar meyipa arudir, parnok küm kabosa anisüngzüktsüla ta shia lir. Ajisüaka MCA secretary Unmesh Khanvilkar-i ashiba agi, iba ken o nungbo iba clause ya apply masütsü, kechiyong tena item state tem indang T20 league tem nung masaya.

India captain Suryakumar Yadav, Shreyas Iyer aser Shivam Dube nunger ajak parnok team temi meyipa agiogo. India nunger Test opener Yashasvi Jaiswal aser asayar tejen Ajinkya Rahane naprongla T20 Mumbai League Season 4 nung asayatsü renema lir, koba June 2 nü tenzüktsü. Jaiswal aser Rahane naprongla kuli balala ajanga taoba season masayatet, saka 'Icon Players' ama züngoksemogo.

Jaiswal ya Bandra Blasters nem agütsüogo, saka pa Afghanistan den New Chandigarh nung June 6 nü nungi tenzükta India team nungi Test ka asayatsü lir, anungji asaya ajak nungbo masayatettsü.

BILEMDANGANG

"Ochi mashi aazükba rongsen taolen memeteter."